

五 居士

龔芳齋

龔芳齋先生。前清監生。其遠祖由渤海落籍大嶼山二澳村。世代以務農爲業。傳至第七世卽芳齋先生。耕餘課讀。設塾授蒙。中年遊泮。光緒庚戌科應省舉。入闈考試。原已中式。唱名時因報籍貫在大嶼山二澳村。主考官以其鄉貫屬於山僻草野之地。向無文名。乃將其名列取消。掉換別人。祇得抱監生銜以終老。民國改元後。賣志林泉。恬淡自居。善摩窠大書。筆法遒勁。薑山觀音廟蓬瀛古洞四字。卽爲其手題。壽屆遐齡。安詳而逝。

楊鐵夫

楊鐵夫居士。原籍廣東中山人。書香世胄。乃昂平梅檀儀真比丘尼胞兄。年三十登光緒科舉人。民國改元。不求仕進。淡泊名利。到處朝禮名山。如寧坡育王。鎮江金山。揚州高旻。等各處名刹。多有墨寶留刻。生平好念佛。行住坐臥不離十八顆串珠。虛雲和尚住持福建鼓山湧泉寺時。親往求受居家五戒。至民國二十五年時年七十來大嶼山梅檀林。在東涌地塘仔買地建靜室一幢。初名桐廬。後改雙樹居。世壽七十六。一生著述豐富。道德文章。爲人推重。惜遺稿散佚無存。

霍仁生

霍仁生居士。廣東南海人。年十八在香港皇仁書院肄業時。偶探友在書房見西湖佳話一本。內有蓮池大師放生善蹟一段。內載七筆鉤。覺得人生如幻如化。一切名利皆虛妄不實。由此覺悟我佛喚醒世人不少迷夢。以後遇有法師講經。必隨喜參聽。又廣購佛教經書研讀。漸有啓發。至戰前虛雲和尚在韶關南華寺傳戒。因是發心前往皈依求受五戒。法名寬仁字佛生。向來隨喜作佛事。喜遊名山勝蹟。曾到十三省地方。如浙江杭州淨慈寺。靈隱寺。天竺寺。理安寺。虎豹寺。玉泉寺。上海玉佛寺。靜安寺。南京鷄鳴寺。毘盧寺。北京廣濟寺。雍和宮。西山臥佛寺。碧雲寺。廣東鼎湖慶雲寺。羅浮華首台丹霞別傳寺。潮州開元寺。及蘇州寒山寺。蕪錫惠山寺。遠至吉林省及各處名山大川。皆喜遊覽。少年畢業於香港皇仁書院及香港大學。曾任元朗博愛醫院主席及徽遠中學校長。現任安樂汽水廠及新亞酒店董事。戰前偕親友來大嶼山昂平探香林靜室。即今靜安居照燃比丘尼。由此因緣。認識筏可和尚。相與談論。獲益不少。覺本山幽靜有甚深佛味。對人生修養甚有助力。至戰後在商務餘暇。結廬於昂平彌勒山下。名曰妙香林。內有鳳凰池及水月閣諸勝。生平好持名念佛坐禪。恬淡自適。不尚浮華。身未出家。心已入道。現年六十五。猶精神矍鑠。健步如恒。對文字著述。隨寫隨泯。不留痕跡。

林楞真

林楞真女居士。廣東中山人。公元一八九九年生於日本橫濱。在橫濱大同學校畢業。至一九一一年回國。尋赴澳門。親近海仁法師暨觀本法師學佛經。趨向淨土法門。皈依印光老法師。一九三五年香港東蓮覺苑開幕。任監苑之職。一九四七年。苑長張蓮覺歸西。繼任東蓮覺苑苑長兼寶覺學校校長。日軍侵港時。東涌地塘仔蓮華台毀於火。光復後智明老尼向佛教會呼籲。願獻出蓮華台。期望佛教大德重興。林居士以香港青年學尼等衆欲居山自修者未有適當學舍。乃接納智明老尼請求。遂將蓮華台重修。鳩工庀材。煥然一新。於一九五七年竣工重光。作爲尼衆安居修持之所。林居士繼承張蓮覺遺志。献身佛教。對佛教事業更發揚光大云。

六 法制

寶蓮寺同住規約並序

棲心息影。端藉名藍。修道循規。必須同志。久參耆宿。以遊歷深而百緒從生。後進時流。因知見淺而初心漸退。以致綱宗失旨。禮範多乖。習以爲然。積成流弊。筏可住持茲山。自慚薄德。空懷佛制。無報法門。欲挽已往頹風。惟冀方來賢衆。共遵佛說戒律。祖制規繩。調治三業。折伏過非。住斯叢林。原爲遵行。如或不然。無勞共住。

一犯根本大戒者出院

一禪貴真參實悟弄口頭禪者出院

一吃葷酒看戲吸食洋煙者罰已出院若重病非酒莫療者白衆方服

一故與有過人往復思害叢林攪亂好人者出院

一鬥諍是非破口相罵交拳相打不論曲直出院

一米麥蔬菜等物不白住持私取用者罰賠償已出院

一施護入寺執事私化緣者量事輕重處罰已出院

一非公事私走檀護及本山尼庵者定非潛修人卽令出院知而不舉者同罰

一己眼不明妄評他人見地出語不知自非者卽令出院

一課誦坐香出坡不隨衆者罰本堂不舉待堂外舉者堂內執事同罰

一除公事不在本寮至各寮縱意放逸者罰

一聚衆賭博賭錢嬉戲追逐不安本份者重罰出院執事不舉者同罰

一無事不得吃二堂食時不得談笑不得爭坐位不得不照位坐不得未結齋先起不得自携碗入厨取

食違者罰

一遇普茶聽規約除公事不隨衆者罰不得托人取茶果歸寮與者取者同罰

一常住經書莊嚴器皿概不借出違者罰不得已白衆方借

一輕視耆德惡聞直言妄生誹謗者出院

一不聽執事人約束調遣及不滿期告假者罰

一非重病背衆飲食者罰

一私留親友歇宿者罰

一各寮聞報鐘不起者罰

一恃己有功不順調伏者罰

一凡受信施物不白執事人知照即受者倍罰除親戚鄰友

一長養鬚髮概不留單暑天赤膊不束褲脚冬天烘火並戴小帽者罰

一常住錢物出入即登記朔望兩序公算失記及含糊者罰

一堂中出外生事者嚴擯借事起單永不復入

一保留有大過人及年輕者出院

一私留徒衆者出院

叢林若無僧值則內外不正。弊何能除。法何能立。當值者宜盡心糾察。不得循情。如有犯者照款罰。失值者僧值受罰。以上條約乃真實辦道之規則。同居大衆各宜珍重。

甲戌年四月八日住持筏可重錄

禪堂規約並序

禪堂乃陶鑄賢聖之所。了生脫死之場。欲透向上一關。捨此無由得入。所謂十方同聚會。個個學無爲。此是選佛場。心空及第歸。既學無爲。即應諸緣屏息。專精參究。若仍散誕。依舊隨情。蓋古規失檢。怠惰成風。時弊多端。提持貴密。雖則現成公案。要須大衆共知。行解相應。則無愧於先宗。道德兼資。乃有利於末學。

是在同心。共相遵守。

一鐘板參差者跪香行禮不服者出堂

一挑唆是非者交拳破口者出堂

一私自逃單者掛牌不許復住

一禪堂內外閒談雜話者罰靜中響動驚衆者罰不服者出堂

一不顧本份交頭接耳者罰

一不滿期不許出堂除充公執私自告假者罰

一出入不白執事者罰止靜不到者罰

一行香坐香不到者罰失悞散香巡香者罰

一值日交代不清者罰破壞什物者罰賠

一不顧本參亂逞機鋒者罰妄作拈頌評論公案者罰

一堂中出入次第而行若竄單亂位穿堂直過並無事闖寮者重罰

一私借堂內什物出外者罰

一滋事失儀不聽執事規諫者罰不聽者出堂

一行坐課誦受食出坡等不隨衆者罰

一檢點他人是非攪羣亂衆者重罰

一警策昏散三香扳不下單者罰

一故縱昏沉者罰爭香扳者罰不服者出堂

一警策後昏沉如故者立參再三警策昏沉如故者跪參不服者出堂

一有事他出歸期失限者罰

一出外不穿長衫者罰

一尊客參堂各依位次不得失儀違者罰

一擅入客堂與人雜話者罰

一私與齋主談話者重罰

一私造飲食者罰

一闖靜者罰

一巡香循情或以公報私故打者罰

一小恙給假三日重病出堂療養不得故留妨衆違者罰

以上條約。本份攸關。如或不遵。自失善利。同居大眾。戒之勉之。

甲戌年四月八日住持筏可重錄

講堂規約並序

夫禪之與教。原無二致。教爲禪詮。禪爲教髓。執文義而守詮。禪亦爲教。離文義而契心。教亦名禪。卽行儀以彰眞如。依模範而成妙道。善財遍法界參求。釋尊示有學成覺。爲參學標榜。作後進楷模。故知由信解以行證。因開示而悟入。典至重矣。非有條章。莫由持守。謹列於左。幸各式遵。

一講經期內託故在外閒遊及應別處經懺者出院

一諍人我是非毀謗講法及法師同學者出院

一不隨衆聽講者罰

一衣袍不正者罰

一別經雜典概不許看違者罰

一預日先細閱大座所講經文庶聽講時易於領會有不解處下座後請問如懈怠不看聽講時昏沉放逸者出堂

一聽經須解義若不解義庶無悟期隨行逐隊虛應故事者出堂

一法師未下座不得先行退出違者罰

以上條約各宜遵守。有疾病者。或尊客隨喜。不拘常例

甲戌年四月八日住持筏可重錄

雲水堂規約

者裏放得下。不妨當處知歸。明日又担去。依舊石頭路滑。暫投一宿。賓主歷然。入衆三餐。精粗須辦。溪山各異。終非究竟因緣。雲月雖同。未是到家消息。個中不了。寸香聊供同參。自業兼修。二課切須共到。可住卽住。慎勿虛延。欲行便行。毋勞擬議。須知負笈担簦。爲明己事。勿以形勞而少安。勿以力倦而多懈。雲堂禪堂。要具規模無二。自心自性。何妨隨處提撕。所有規條。謹列於左。

一本堂安單。凡課誦坐香止靜等。並隨禪堂規式。日逐祇圖在外閑遊者。罰睡眠時談笑者。罰

一近午到午飯。隨衆近晚到晚餐。隨衆晚到一宿。次日午飯卽行。天雨待雨止。有病待病愈。

一衆中有不守清規者。寮元善勸不聽。卽白衆查明。白客堂遷單。若不自白。衆徑自亂嚷亂罵者。罰亂打者重罰

一隨喜出外久不歸堂者。罰

一聞普梆不隨衆出坡者。罰

一威儀不整肅者罰

一議論諸方知識長短好惡者罰好逞機鋒者罰

一過堂上殿不搭衣者罰

一遇有來踪詭異言辭閃爍人即須從細查問恐有匪徒託跡致啓禍端顛預失察者罰

甲戌年四月八日住持筏可重錄

厨房條規

寸薪粒米。當知來處之艱難。滴水殘蠶。須念作時之非易。既不肯暴殄於天物。更當思調和夫衆口。酸鹹適味。香甘得宜。慎重烹飪。勿生輕忽。以供養爲懷。不貪果腹。雖隨衆作務。常抱道心。粥飯三時。不得一朝失誤。晨昏二課。何妨數刻清修。銘曰

雪峰飯頭。瀉山典座。古德芳風。於今未墮。攝爾狂心。慎爾口過。運水搬柴。毋忘者個。堂內坐禪。堂外禪坐。誰知傳衣。不離碓磨。故此行門。佛天所喜。求福則得。造業則失。勤謹廉隅。求福之本。偏衆懈怠。造業之基。謹遵規銘。爲此良師。

一厨房共住者粥飯小食俱在厨下同衆甘苦

一概不許別處私食及私留鮮美自食者罰早課不上殿者罰竊取常住油米食物者倍罰出院

一菜頭洗切大衆菜辦齋等事一齊相幫不到者罰

一飯頭煮大衆粥飯洗鍋二飯相幫抬飯器推諉失事者罰

一貼案收拾客菜小火頭燒火雜務洗鍋留私菜者重罰

一雜務到庫房取客菜偷取私留者重罰出院

一廚房高聲大叫者罰飲酒賭博者重罰出院

一設齋日頭堂所剩腐菜晚粥再供大衆不得棄擲違者罰

一不得將滾湯潑地上傷蟲蟻命違者罰

甲戌年四月八日住持筏可重錄

念誦規約

古之叢林。高蹈絕俗。除祝釐外。不通應酬。正爲大事不明。剪爪不暇。那肯應酬。散其道念。又若自未度。何以度人。故經云。瑜伽一事。乃登地菩薩利生之事。非初心凡夫所宜。然恐叢林淡薄。缺乏所需。衲子懈修。法門衰減。不得已乃略應念誦。必也進壇生道場想。對經像如對佛想。誦其文。思其義。行其事。踐其實。必使身與口合。口與心合。不昏沉。不散亂。不懈怠。不貪利。知因果。知慚愧。兢兢業業。若是。則不期度人而自度人。不期利益而自利益。所謂人以財與我。我以法與人。等施無異。猶可權爲。若不識字。或不出聲而誦。

經。若不觀想全無誠意而禮懺。或身對尊像而目視他方。或口誦經懺而心存別念。如是。必招現前叢林道衰。未來自靈受苦。使自利利他之法寶。反成自誤誤人之罪案。可不慎哉。所有規條謹陳於左。

一念誦人是日見牌上有名。卽沐浴潔淨入壇。須身到眼到口到心到。不得於誦經懺時夾雜閑語。不得於經懺歇後在壇戲談。

一念誦時不得回頭轉腦看人看物。須一心稱念字字分明不出聲者罰。

一主法人不得散心妄想。宜一一依文精誠作觀。

一表白人不得急遽簡略。宜一一依文次第宣誦。其鐘鼓等宜莊重雅馴。不宜繁碎。

一經懺及施食等不得法事未竟先收佛像莊嚴器物。

一施食要一一依文精誠結印誦咒作觀。三業相應不得含糊彈舌急促了事。白文亦然。

一香燈要誠潔。小心燈火燭。

一香燭供果等倘落地者不用。已供過者不用。

一庫房要打點整理。合用法物不得苟簡。

以上條約。須信受遵守。不然自取殃禍。可不慎哉。

雲棲法彙云。近日應赴者。水陸頭尾相連。經懺接續不斷。求經次。汲汲如選官。開牌名。忙忙如報喜。經懺

日盛。則道業日微。應緣者當自警也。

甲戌年四月八日住持筏可重錄

祝釋迦佛誕儀式

農曆四月初八日早課祝聖。客堂掛牌云。午飯後。兩序大眾師聞鐘聲齊詣大殿前。稱揚聖號浴佛。伏願佛日增輝。法輪常轉。

時至鳴大鐘三下。大眾齊詣殿前。殿中先設花亭。中供佛降生悉達太子小像於香湯盆內。安二小杓。維那師舉香讚。住持拈香拜已。維那至中拈香展具三拜已歸位唱云。釋迦如來。九龍吐水。灌沐金軀。維那舉法身咒。衆同和唱。住持在浴亭中太子降生像以右手持杓浴佛。以次班首職事大眾同浴已。念咒至浴完乃止。大眾各歸本位。維那長跪合掌高聲白安位文云。

恭聞法身現相。祥光靄淨飯之宮。化佛應真。瑞氣擁迦維之國。金軀生處。便能一手指天。寶體浴時。遂感九龍吐水。四方遍顧。七步成蓮。稱上下之獨尊。受人天之交讚。不戀王宮富貴。直趣雪嶺修行。十九學道出家。三十降魔成佛。演經至五千餘卷。住世於八十多年。開三乘方便之門。導七趣菩提之路。憶昔二五百年前。我佛降臨。當今公元一九五六年來。真風遠被。衆生荷生成之德。今辰竭慶賀之誠。冰潔道場。雲臻梵侶。金盆高捧。喜觀悉達太子之金容。聖水頻傾。仰見摩耶夫人之聖德。欲覲我佛之光輝。須仗雷

音之唱和。

維那白竟舉偈衆和

天上天下無如佛。十方世界亦無比。世間所有我盡見。一切無有如佛者。我今灌沐諸如來。淨智莊嚴功德聚。五濁衆生令離垢。同證如來淨法身。香花燈塗妙莊嚴。供養如來法報化。唯願慈悲受供養。窮未來際作佛事。

衆和唱畢。將佛聖像安回本位。將一切供物器皿。仍歸佛座前已。維那舉供養讚畢。三皈依竟。各回本處。浴佛經出大藏經。明藏才字函。清龍藏知字函。準經所說。先作方壇。中以淨坭和香水作口桌一張。敷浴床座。上安浴盤。盤內安小浴床。床上供悉達太子像。人各以二指取少許水浴佛。口誦偈咒。浴佛之水。各自洗頭。名吉祥水。浴竟用棉拭潔。仍供座上云。

是日大殿門口書聯云

功圓萬德位證一乘是天中天扇眞風於末世
橫遍十方豎窮三際作聖中聖揭慧日於羣生

祝釋迦佛成道

十二月初八日。客堂掛牌。早課祝聖與佛誕日相同。午梆佛前上供。大衆齊集。燒香。傳爐。住持上香。維那

舉讚。齊念供養咒畢。維那出班上香展具三拜。長跪合掌高聲作白文云。

恭聞如來無量劫來成佛。豈假進修。爲憫衆生日用不知。示以先覺。覺自覺他而成覺道。世出世間而稱世尊。闡一代之化儀。遵先佛之遺軌。坐菩提樹。魔宮隱而無光。現優曇花。法輪熾然常轉。故始喻初日先照。而末示拈花正傳。顧末裔之何知。誦遺言而有惕。於今月八日。恭遇如來成道之辰。現前大衆。少伸供養。所願色空明暗。咸宣微妙法音。蠢動含靈。共證智慧德相。

白已一拜起具復位。舉讚禪悅藏三稱畢回堂

釋迦佛涅槃儀

二月十五日佛示現涅槃。客堂掛牌云。是日聞鼓聲大衆師依派班次。詣大殿禮釋迦如來。涅槃禮讚文懺。誦遺教經。早粥後兩序排班挨次上殿。住持說法畢誦經回堂。至午梆上供儀式與成道日同。唯換文云。

恭以能仁應世。寂默證真。廓千界以居尊。撫四生而爲子。形隨物現。元同非相之身。教逐機興。詎異無言之道。爰自法輪再轉。化迹彌隆。半字初談。譬擊蒙而靡倦。百金後寄。猶贖命以唯勤。普令煩惱之儔。安住如來之藏。四心告滿。三德云歸。所謂不令一人獨得滅度。皆以如來滅度而滅度之。是故入於涅槃。不可得而思議。我等鶴林既遠。悲痛失於前緣。像法猶存。忝恪遵於遺訓。今值仲春之日。緬懷北首之時。潤藻

溪蘋聊表薦羞之禮。升香歎德。少申哀慕之誠。唯願洪慈。俯垂昭鑒。白已一拜起具復位。舉讚禪悅藏三稱畢回堂。是日書聯云。

順世無常。囿於化者終於盡。
是名寂滅。寓諸幻而返諸真。

又書大殿聯云。

大定恒常。永住恒河沙劫。
圓機普應。示現千百億身。